

*A dì 16 mazo in coleio.*

*Nominati per lo episcopo di Baffo, domino Giacomo da cha' da Pexaro, legato apostolico, e domino Marco Caquerano, nontio pontificio, di quali, balotati, rimaseno tre.*

- † Sier Almorò Pixani, *quondam* sier Hironimo,
- † Sier Antonio da Pexaro, ch'è soracomito, *quondam* sier Francesco, eleto,
- Sier Andrea Bondimier, fo soracomito, de sier Zanoto,
- Sier Zuan Moro, fo soracomito, *quondam* sier Antonio,
- Sier Lorenzo Sagredo, fo primo di nave, *quondam* sier Alban,
- † Sier Silvestro Trun, fo soracomito, *quondam* sier Mafio,
- Sier Fantin Querini, fo patron di galia, *quondam* sier Anzolo,
- Sier Zuan Alvisè Pixani, di sier Nicolò,
- Sier Andrea da Pexaro, *quondam* sier Bortolo, *quondam* sier Luca, procurator,
- Sier Zorzi Simitecolo, fo soracomito, *quondam* sier Zuane,
- Sier Troian Bolani, patron di barza electo, *quondam* sier Hironimo,
- Sier Lorenzo Zustignan, *quondam* sier Onfre'.

Et per coleio fo risalvò di armar, per la Signoria, a sier Antonio da Pexaro, soracomito.

*A dì 31 mazo, in coleio.*

Fu preso, li exatori di officij si balotino in coleio di tre mexi in tre mexi.

*j exator a li governadori, in luogo di sier Francesco Da Ponte, refudò.*

Sier Andrea Contarini, *quondam* sier Carlo.

125

*Dil mexe di mazo 1502.*

*A dì 4.* Vene letere di Candia, di 29 marzo. Comme era ivi gran charestia di formenti, et quasi il populo si havia levato a rumor; et che li rectori, sier Marco Barbo, ducha, e sier Bortolo Minio, capetanio, li dava tanto pan per caxa; ma pur vi era zonta una nave, carga di formento, *adeo* quel po-

pulo si alegrò molto; e che infin quel zorno haviano spazà 4 galie sotil e atendeva a expedir il resto.

*Da Napoli di Romania.* Si ave aviso dil zonzar li ducati cinque milia mandadi, e monition mandateli; e tutti stavano di bon animo, ch'è stato optima cossa a lhorò bisogno.

*Da Corfù, dil capetanio zeneral, di 19 april.* Come era con 7 galie, et era stato a certo locho dil turcho a presso l'Arta, zoè quel colfo, et nulla havia potuto far. E che uno nevodo d'Erichi, corsaro turcho, era ussido con 14 vele, et era stato a uno nostro locho in l'Arzipielago, et fato pocho danno. *Etiam* fo dito, che tre nostre galie, zoè sier Lorenzo Loredan, sier Zuan Vituri et uno Buchia da Cataro, trovono 6 fuste di turchi; e li nostri sopracomiti non volseno investir, ma el catarin investì e butò una fusta a fondi, e una altra prese. El qual sopracomito zonse poi a Rodi, e il gran maistro lo fè cavalier.

*A dì 6 mazo.* Gionse a Verona el baly dil Digiu, ch'è al presente governador a Milan, in loco dil governador è andato in Franza; or, per letere di la Signoria, fo honorato assai. Havia 70 cavali. È huomo piccolo e corpulento, et è governador di Como. Era con lui do milanesi, domino Antonio Maria Palavicino et Lodovico Boromeo. Questo vene a Venecia, per veder la Sensa et la terra; fo honorato assai, fatoli le spexe; e poi, nel ritorno, fè la volta per Mantoa; el marchex li fè gran honor. Et a Venecia zonto, volse veder tutto, fo a conseio, a dì 11 mazo; e fo fato luogo tenente in la Patria di Friul, et niun non passò.

In questi zorni domino Zufè Carlo, orator dil re di Franza, che *iterum* fo al re di romani, tornò in Franza, a Lion, per la via di Roverè; et *dicitur*, lo acordo tra quelli re non siegue, e Maximiano vol mandar al *roy* cinque oratori.

È da saper, za uno mexe morite in Franza el principe di Orangie, borgognon, di primi capetani regij.

*De Ingaltera, si have letere, di sier Francesco Capelo, el cavalier, orator nostro, di 8 april.* Come era morto il fiol primario di quel re, di anni 16, a Guales; qual era maridato ne la fia dil re di Spagna, qual è ivi su l'isola.

*A dì 9 mazo.* Gionse a Verona domino Acurisio Maynieri, orator dil re di Franza, torna *iterum* a star a Venecia per orator. Fo honorato assai, di hordine di la Signoria; partì per Vicenza, dove, per la intrata del novo podestà, sier Andrea Trivixan, el cavalier, li fo fato una festa in palazzo; *demum*